

Visoki predstavnik donio odluku o tarifama električne energije za industriju

Visoki predstavnik Paddy Ashdown je juče donio Odluku kojom se uspostavlja opći okvir za rješavanje situacija u kojima industrijska preduzeća i njihovi snabdjevači električnom energijom ne uspiju dogovoriti cijenu.

Ovo je privremena odluka kojom se osigurava nediskriminatorska osnova za utvrđivanje odgovarajuće cijene električne energije u takvim slučajevima. Odluka će biti na snazi sve dok Vlada Federacije ne utvrdi odgovarajuću regulatornu strukturu za tržište električne energije, kao i pravičan i komercijalno održiv okvir za strateška preduzeća.

Visoki predstavnik je donio ovu Odluku zbog toga što Vlada Federacije nije uspjela da riješi spor u vezi sa obezbjeđenjem električne energije za Aluminij Mostar. Neuspjeh pregovora između Aluminijskog zavoda i njegovog snabdjevača električnom energijom je prijetio da ugrozi elektroenergetsku mrežu i da dovede do zatvaranja najvećeg bh. izvoznika. To bi izazvalo ekonomsku i političku krizu u Federaciji.

OHR je stoga bio primoran da donese privremeni okvir za stalno obezbjeđenje električne energije ovom preduzeću, uvođenjem Aluminijskog zavoda u standardni tarifni sistem električne energije za preduzeća u Federaciji Bosne i Hercegovine.

Sada je na elektroprivrednim preduzećima i resornom ministarstvu da izračunaju tu tarifu na osnovu postupka koji je utvrđen prema standardnom tarifnom sistemu.

U svom pismu premijeru Federacije Bosne i Hercegovine Ahmetu Hadžipašiću, i ministru energije, rudarstva i industrije Izetu

Žigiću, od 31.decembra 2003. godine, visoki predstavnik je rekao "teško mogu zamisliti gori početak godine u kojoj organi vlasti u BiH moraju pokazati da su u stanju preuzeti odgovornost od toga što moram djelovati danas u cilju spašavanje ekonomije od propusta koji ugrožavaju egzistenciju građana. U budućnosti, nadam se Šodgovornosti će seć provoditi tako da se u prvi plan stavljaju interesi zemlje i njenih napaćenih građana, a ne interesi nacionalnih rivala.